

11. maj 2016

Pisorta qarfinni aamma Pisortat suliffe qarfiutaanni tamani sulisussanik atorfinitsitsisarnermi oqaatsitsinnik, nunatsinni pissutsinik inooriaasitsinnillu ilisimasaqarnissap piumasaqaatit inissisimalernissaannut periarfissat pillugit kingusinnerpaamik UPA2017-imi nassuiaammik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. (Taamaaliornikkut oqaatsitta kulturittalu ataqqineqarnissaannik inuiaqatigiit kalaallit pissusissamisoortumik piumasaqaataat atorfinitsitsinerni ataqqineqarluni atorneqalissammat).
(Inatsisartunut ilaasortaq Vivian Motzfeldt, Siumut)

Siumumiit nuannaarutigaarput Vivian Motzfeldt, Siumut, oqaluuserisassamut pingaaruteqartumut nassuiaammik saqqummiusseqqulluni oqaluuserisassanngortitsimmat, taamaasilluni oqaatsitta atorfeqartitsinikkut alloriaqqinnissaat paasisanik periarfissanillu toqqammaveqarluta aalajangiiffigiumaarnissaannut periarfissaqalissagatta.

Nuna namminersulivinnissamik/namminiilivinnissamik siunertaqartup inui pingaartitassaraat sapinngisamik pisinnaasat piginnaasallu nunamut naleqquttut pilersissallugit sapinngisamillu pisariaqartitsineq annerpaamik nunagisami matussusersinnaassallugu.

Ukiorpasuunngortuni maanna oqaatsitta inuiaqatigiit akornanni qanoq inissisimameri oqaluuserineqartarput. Nunatsinni Oqaatsinut politikki nutaajusutut taaneqarsinnaavoq taamaattumik suli naleqqussarlugu pitsanngorsarnissaanut suliniutit ingerlasariaqarneri ersarissarusupparput.

Qanoq amerlatigisorpiaat oqaatsitsinnik atuisuunersut, misissuineramik aallaaveqartut kingullit pigineqartut 2003-meersuupput SLiCA-mit suliarineqarlutik, tassuuna takutinneqarpoq pisariaqarluinnartoq nutaanerusunik paasissutissanik amigaateqartugut. SLiCA-mi paasissutissat takutippaattaq qallunaatuinnaq oqaaseqartuusut taakkuusut kalaallisut ilikkariartunngitsut. Tassuuna takutinneqarpoq alloriartoqassappat oqaatsitta taakkunangassaaq atorneqarnissaannut kajungersaanisaaq iliuuseqarnikkut pisariaqartoq.

Oqaatsivut pineqartillugit ajoraluartumik oqallinneq ammit qalipaataannut immikkoortitsinertut inissinniarneqartarpoq, soorluttaaq inuiaqatigiinni oqallisigineqarsinnaanera apeqquserneqartartoq. Oqaatsivut atorlugit ilisimatusarnerit aqutugalugit meeqqat atuariini ilinniarfinnilu ilinniusiornikkut ilinniartitaanikkullu nukittorsaavigineqanngippata, immikkullu aningaasaliisoqanngippat, nukittorsaanissap apeqquserneqartuassanera tupinnanngilaq.

Taamaammatt oqaatsivut nukittorsarneqassappata ilinniartitaanikkuttaaq annertuumik nukittorsagassaqartoq takuneqarsinnaavoq, soorluttaaq suminngaaneersunilluunniit atorfeqartitaanikkut inuiaqatigiinnut akuliussinnaanerup pingaaruteqassusaa oqaatsivut aqutugalugit nukittunerusumik sapiissuseqarfigineqarluni iliuuseqarfigineqartariaqartoq isumaqarfigaarput.

Nunat inoqqaavisa atugaat nunatsinnut assingusunik ajornartorsiuteqarlutillu pikkoriffeqarajuttarput taakkuuppullumi assersuuffittut qiviagassat ingerlariaqqinissamullu iliuuseqarnissamut sanilliuffigalugit alloriarfissatut naleqqunnerpaasussat.

Nunat nunasiaateqarnikuusut allatigulluunniit kulturitsinnut assinguffeqanngitsut assersuuffiginiartarlugit aallaavigineqartarneri assut apeqqusernarpoq, taamaaliornikkut nunatsinni 'imminut inorsittaarineq' pilersinneqartarmat, taamaattumik ajorsarnerit amerlisarnagit ajugaaffissat amerlisartariaqarpagut soorluttaaq tamanna siunnersuuteqartup siunertamisut ujartoraa.

Siunissami suliffeqarfinni atorfininnerni oqaatsivut piginnaasatut naleqarnerusumik inissinneqarnissaannut eqqarsarneq nutaajunngilaq, Saamit Kautokeino kommunianiittut innuttaasa amerlanerussuteqarluartut Saamisut oqaluttuummata piumasaraat akissarsiatigut iluaqusiineq aqcutigalugu pisortat suliffiinni Saamisut oqalussinnaanerat iluaquteqassasoq.

Atorfeqareersut Saamisut oqalussinnaangitsut akissarsiatigut eqqorniarneqanngillat sunniuteqarfigineqaratillu, kisiannili nutaanik atorfinititsinerni oqaatsit illersornissaat siunertaralugu akissarsiatigut kaammattuinerterlugu piumasarineqarluni. Taamaaliorneq akerliusunit sapiisernertut isigineqarpoq taamaattorli nunarsuatsinni arajutsisimannngilarput oqaatsit illersorneqaratik kajumissaasersorneqaratik inissisimatinneqaraangata oqaatsit eqiteriffiusut ajugaarsartut sumiifinnilu oqaatsit nipaatumik nungukkiartulersarlutik.

Taamak Siumumiit oqaaseqarluta aalajangiiffigisassatut siunnersuutit tamakkiisumik taperserlugu ingerlateqqitassanngorlugu akueraarput.

Suka K. Frederiksen

Siumut